

14/02

ZAKON
O KOMUNALNIM TAKSAMA
(Prečišćen tekst)

I - OPĆE ODREDBE

Član 1.

Ovim zakonom propisuje se način plaćanja komunalnih taksa (u daljnjem tekstu: takse) na području Kantona Sarajevo (u daljnjem tekstu: Kanton).

Član 2.

Takse se plaćaju za:

1. svaku istaknutu firmu,
2. iznajmljivanje nekretnina licima koja nisu državljani Bosne i Hercegovine,
3. držanje sredstava za igru (bilijar, automati, fliperi, video igre, pikado, aparati za posebne igre na sreću i sl.),
4. držanje žive muzike u ugostiteljskim objektima,
5. zauzimanje trotoara i dr. površina ispred poslovnih prostorija,
6. isticanje objava, oglasa i saopštenja na javnim mjestima,
7. korištenje prostora za kampove (šatore, prikolice, automobile).

Član 3.

Visina taksa po predmetima i uslugama za čije korištenje se plaća taksa utvrđuje se općinskim odlukama, s tim da visina istih ne može biti veća od visine utvrđene u Tarifi komunalnih taksa (u daljnjem tekstu: Tarifa), koja je sastavni dio ovog zakona.

Član 4.

Pravna i fizička lica koja obavljaju djelatnost na osnovu odobrenja nadležnog organa dužna su na vidnom mjestu svih prostorija gdje obavljaju djelatnost istaknuti naziv firme.

Pod nazivom firme podrazumijeva se: naziv firme pod kojim je takseni obveznik registrovan kod nadležnog organa, sjedište lica kao i broj, odnosno naziv poslovne jedinice kada se firma ističe na poslovnoj jedinici.

Firma se ističe najkasnije danom početka obavljanja djelatnosti.

Član 5.

Takseni obveznik je lice koje koristi predmet ili uslugu za čije korištenje je propisano plaćanje takse.

Ako za istu taksu postoje dva ili više obveznika, njihova obaveza je solidarna.

Član 6.

Taksa se plaća u trenutku nastanka taksene obaveze, ako ovim zakonom nije drugačije propisano.

Član 7.

Taksena obaveza nastaje u trenutku kada se počinje koristiti predmet ili usluga za čije je korištenje propisano plaćanje takse.

Član 8.

Takse se plaćaju u gotovom novcu i prihod su općine.

Izuzetno od prethodnog stava, prihod od komunalnih taksa pripada općinama, s tim što će općine koje čine Grad Sarajevo dogovorom utvrditi raspodjelu prihoda po ovom osnovu između općine i Grada Sarajeva.

Takse se uplaćuju na platni račun prihoda od taksi kod ovlaštene organizacije za obavljanje platnog prometa.

II - OSLOBAĐANJE OD PLAĆANJA TAKSE

Član 9.

Od plaćanja takse oslobođeni su:

1. Bosna i Hercegovina;
2. Federacija BiH, Kanton Sarajevo, općine sa područja Kantona Sarajevo i njihovi organi;
3. Centralna banka BiH;
4. Ustanove iz oblasti predškolskog obrazovanja, prosvjete, nauke, kulture i prirodne baštine, sporta, zdravstva, veterinarstva, socijalne zaštite, humanitarne i dobrotvorne organizacije, iz osnovne djelatnosti;
5. Udruženja koja ne obavljaju privrednu djelatnost;
6. Vojni invalidi, izuzev tač. 3. i 4. iz člana 2. ovog zakona;
7. Lica kojima je rješenjem nadležnog organa priznato svojstvo člana porodice poginulih, umrlih, nestalih i zarobljenih boraca, RVI i civilne žrtve rata.

Pored oslobađanja iz prethodnog stava, obveznicima takse koji obavljaju niskoakumulativne i deficitarne djelatnosti, koje su kao takve utvrđene odlukom Vlade Kantona, umanjuje se taksa za 50%.

Općine na području Kantona mogu svojim odlukama odrediti vrijeme oslobađanja od plaćanja takse poduzetnicima koji prvi put pokreću privrednu ili uslužnu djelatnost.

Član 10.

Zahtjev za oslobađanje od plaćanja taksi podnosi se Poreznoj upravi - nadležnoj općinskoj ispostavi (u daljnjem tekstu: Porezna uprava).

III - OTPIS TAKSE

Član 11.

U slučaju smrti taksenog obveznika fizičkog lica, Vlada na prijedlog Ministarstva finansija otpisuje taksu.

Zahtjev za otpis Ministarstvu finansija podnosi nasljednik taksenog obveznika.

IV - NAČIN PRIJAVE I NAPLATE TAKSE

Član 12.

Obveznik takse iz člana 2. tač. 1. i 3. dužan je Poreznoj upravi podnijeti prijavu za razrez takse.

Prijava iz prethodnog stava sadrži slijedeće podatke: naziv firme, sjedište ili prebivalište taksenog obveznika, broj računa obveznika otvorenog kod ovlaštene organizacije za obavljanje platnog prometa, mjesto gdje je firma istaknuta, broj istaknutih firmi, mjesto gdje se sredstva za igru nalaze, vrstu sredstava za igre i broj sredstava za igre.

Član 13.

Prijava za razrez takse iz prethodnog člana podnosi se do 30. januara tekuće godine, prema stanju na dan prvog januara tekuće godine za koju se razrez vrši.

Promjene nastale poslije prvog januara tekuće godine, odnosno u toku godine, takseni obveznik je dužan prijaviti Poreznoj upravi najkasnije u roku od 15 dana od dana nastanka promjene.

Taksenim obveznicima koji ne podnesu prijavu u skladu sa st. 1. i 2. ovog člana ili daju netačne podatke, razrez takse izvršit će se po taksenoj tarifi uvećanoj za 50%.

Član 14.

Obveznik takse iz člana 2. tačke 4. ovog zakona dužan je najkasnije tri dana prije početka organizovanja žive muzike prijaviti Poreznoj upravi dan početka i dan završetka organizovanja žive muzike.

Član 15.

Obveznik takse iz člana 2. tač. 1. i 3. ovog zakona plaća taksu u godišnjem iznosu u roku od 15 dana od dana donošenja rješenja Porezne uprave.

Na rješenje Porezne uprave takseni obveznik može uložiti žalbu nadležnom drugostepenom organu Porezne uprave u roku od 15 dana od dana prijema rješenja.

Žalba na rješenje o razrezu takse ne odlaže izvršenje rješenja.

Taksu iz člana 2. tač. 2., 4., 6. i 7. obveznik takse plaća na način i u rokovima u kojima se plaća i porez na promet proizvoda i usluga u prometu.

Taksa iz člana 2. tačka 5. ovog zakona plaća se kod nadležnog organa unaprijed prije izdavanja rješenja za zauzimanje prostora, a srazmjerno vremenu za koje se odobrenje izdaje.

Izuzetno od prethodnog stava, ako se odobrenje izdaje na period duži od jedne godine takse se naplaćuju za svaku narednu godinu unaprijed do 30. januara tekuće godine.

Član 16.

Obveznik takse iz člana 2. tač. 2., 4., 5. i 6. ovog zakona dužan je Poreznoj upravi podnijeti prijavu o obračunatim i plaćenim taksama.

Prijava se podnosi do 5. u mjesecu za prethodni mjesec.

Član 17.

Ako takсени obveznik u propisanom roku ne uplati taksu, Poreska uprava izdat će nalog ovlaštenoj organizaciji za obavljanje platnog prometa kod koje takсени obveznik drži novčana sredstva za prinudnu naplatu za prenos duga komunalne takse i pripadajuće kamate sa računa takšenog obveznika na račun korisnika takse.

Član 18.

Ukoliko se na način iz člana 17. ovog zakona ne može podmiriti taksena obaveza u roku od 60 dana od dana izdavanja naloga za prenos sredstava ovlaštenoj organizaciji za obavljanje platnog prometa, nadležna Porezna uprava će donijeti rješenje o prinudnoj naplati takse, kamatama i troškovima postupka iz cjelokupne imovine takšenog obveznika.

Prinudna naplata po prethodnom stavu sprovedeće se po propisima kojim se utvrđuje naplata potraživanja od pravnih lica, odnosno po propisima kojima se reguliše prinudna naplata javnih prihoda od fizičkih lica.

Član 19.

Pravo na naplatu takse, kamata, troškova prinudne naplate zastarjeva za dvije godine po isteku godine, u kojoj je obaveza takse utvrđena od strane nadležnog organa.

Pravo zastare prekida se svakom radnjom nadležnog organa za naplatu poslije koje radnje počinje teći novi rok zastare.

V - POVRAT TAKSE

Član 20.

Obveznik od kojeg je taksa i kamata naplaćena, a koju nije bio dužan platiti, ima pravo na povrat.

Zahtjev za povrat se podnosi Poreznoj upravi koja je nadležna za utvrđivanje takse.

Porezna uprava je dužna da u roku od 20 dana odluči o zahtjevu.

Član 21.

U dijelu razreza taksi, naplate, zastare, povrata i ostalih poslova vezanih za komunalne takse u kome to nije posebno regulisano ovim zakonom, primjenjivat će se odredbe odgovarajućih poreznih zakona i Zakona o općem upravnom postupku.

VI - NADZOR

Član 22.

Nadzor nad primjenom ovog zakona vrši Ministarstvo finansija Kantona Sarajevo i Porezna uprava Kantonalni ured Sarajevo.

VII - TARIFA KOMUNALNIH TAKSA

Član 23.

Tarifni broj 1.

Za svaku istaknutu firmu, oznaku, obilježje ili natpis na poslovnim i drugim prostorijama, objektima i mjestima, kojim se označava da određeno pravno ili fizičko lice obavlja izvjesnu djelatnost ili zanimanje, plaća se godišnja taksa koja ne može biti veća od:

KM

1. iz oblasti distribucije nafte i naftnih derivata 5.000
2. iz oblasti proizvodnje i prerade duhana 5.000
3. iz oblasti proizvodnje alkoholnih pića i piva 5.000
4. iz oblasti proizvodnje bezalkoholnih pića 2.000
5. iz oblasti telekomunikacija (sjedište) 10.000
6. iz oblasti telekomunikacija
(izdvojene lokacije van sjedište) 2.000
7. iz oblasti bankarstva
(sjedište, podružnice, filijale, ekspoziture i sl.) 10.000
8. bankomati i izdvojeni šalteri banaka 1.000
9. iz oblasti poštanskih usluga (sjedište) 5.000
10. iz oblasti poštanskih usluga (izdvojene lokacije) 500
11. iz oblasti poštanskih usluga (izdvojeni šalteri) 300
12. iz oblasti osiguranja i reosiguranja (sjedište) 10.000
13. iz oblasti osiguranja i reosiguranje
(filijala- podružnica) 1.500
14. iz oblasti osiguranja i reosiguranja
(izdvojeni šalteri) 500
15. iz oblasti igara na sreću i to:
 - a) lutrija, lota, sportska prognoza, TV bingo
(sjedište pravnog lica) 15.000
 - b) lutrija, loto, sportska prognoza, TV bingo
(svaka druga lokacija) 2.000
 - c) kasino (sjedište) 12.000
 - d) kasino (svaka druga lokacija) 2.000
 - e) sportske kladionice (sjedište) 12.000
 - f) sportske kladionice (svaka druga lokacija) 2.000
 - g) tombola i bingo u zatvorenom prostoru 5.000
16. aparati za samoposluživanje u stalnim
prodajnim mjestima 300
17. aparati za samoposluživanje na ostalim lokacijama 200

18. iz oblasti proizvodnje i distribucije električne energije (sjedište) 1.500
19. iz oblasti proizvodnje i distribucije električne energije (podružnice ili službe) 500
20. iz oblasti proizvodnje električne energije u mini elektranama 200
21. iz oblasti vanjske trgovine i trgovine na veliko 500
22. tržni centri, hipermarketi 5.000
23. tržnice i pijace 1.500
24. iz oblasti trgovine na malo koja se obavlja u kioscima 200
25. iz oblasti trgovine na malo koja se obavlja u ostalim prodajnim mjestima 300
26. iz oblasti ugostiteljstva - hoteli 1.200
27. iz oblasti ugostiteljstva - moteli i pansioni 1.000
28. iz oblasti ugostiteljstva-ostali objekti 500
29. u prevozu robe motornim vozilima 100
30. u prevozu putnika 300
31. u prevozu putnika taxi automobilima 50
32. u advokatskoj djelatnosti 1.000
33. privatna zdravstvena zaštita 1.000
34. samostalne zanatske radnje 50
35. iz oblasti ostalih nepomenutih djelatnosti 150

Ako se pod jednom firmom obavlja više djelatnosti za koje je propisana različita taksa, taksa se razrezuje i plaća za djelatnost za koju je propisana najviša taksa, izuzev djelatnosti koja se, zbog prirode djelatnosti, obavlja na izdvojenom lokalitetu.

Ako je za tekuću godinu plaćena taksa, a u toku godine se promijeni sjedište ili vlasnik firme, taksa se za tu godinu ne razrezuje.

Ako firmu ističe lice čije sjedište nije u Kantonu, taksa se uvećava za 20%.

Ako se firma ističe u drugom polugodištu, taksa se razrezuje u iznosu od 50% od propisane.

Samostalnim privrednicima taksa se razrezuje u iznosu od 60% od propisane takse, izuzev taksi iz tač. 29., 30. i 31. ovog tarifnog broja.

Za iznajmljivanje nekretnina licima koja nisu državljani BiH za jedno lice plaća se taksa koja ne može biti veća od 1,5 KM dnevno.

Naplatu takse po ovom tarifnom broju vrši lice, odnosno vlasnik nekretnine koja se izdaje.

Tarifni broj 3.

Za držanje sredstava za igru, plaća se godišnje po jednom komadu, odnosno predmetu i aparatu taksa koja ne može biti veća od:

1. Na bilijar stolove, flipere, automate, pikado i dr. sredstva za igre gdje je dobitak isključivo 800
2. na aparate koji donose novac 2.000

Pod aparatima koji donose novac podrazumjevaju se elektronski ili mehanički aparati koji tokom igre omogućuju igraču dobitak u novcu ili žetonima koji su naplativi u novcu.

Ako se sredstva za igru počnu koristiti u drugom polugodištu, propisana taksa se umanjuje za 50%.

Tarifni broj 4.

Za držanje žive muzike u ugostiteljskim objektima plaća se taksa koja ne može biti veća od dnevno 100

Tarifni broj 5.

Za zauzimanje trotoara, javnih i slobodnih površina plaća se:

1. za postavljanje stolova ispred ugostiteljskih objekata, poslastičarnica i drugih objekata u svrhu pružanja ugostiteljskih usluga plaća se po jednom stolu taksa koja ne može biti veća od dnevno 3
2. za postavljanje stolova, pulteva, tezgi stolova i dr. za prodaju knjiga, razglednica, bižuterije i drugih proizvoda plaća se taksa koja ne može biti veća od, po prodajnom mjestu dnevno 2

Tarifni broj 6.

Za isticanje plakata i panoa na javnim mjestima određenim za te namjene plaća se jednokratno taksa koja ne može biti veća od, i to:

- za seriju do 100 kom. 100
- za seriju preko 100 kom. 200
- za postavljanje stalnih panoa i displeya po 1 m. 10

Tarifni broj 7.

Za korištenje slobodnih površina za kampove (šatore, prikolice, automobile), deponije materijala i drugu privremenu upotrebu plaća se dnevno taksa koja ne može biti veća od, i to:

- a) za svaki šator 2
- b) za kamp prikolicu 1
- c) za automobil 1

Naplatu takse po ovom tarifnom broju vrši lice koje upravlja slobodnim površinama.

VIII - KAZNENE ODREDBE

Član 24.

Novčanom kaznom u iznosu od 500 KM do 10.000 KM kaznit će se za prekršaj pravno lice:

- ako ne podnese prijavu ili ako da netačne podatke za razrez takse (član 12.);
- ako ne podnese prijavu u roku iz člana 13. ovog zakona;
- ako ne prijavi Poreznoj upravi dan početka i dan završetka organizovanja žive muzike (član 14.);
- ako ne plati taksu u skladu sa članom 15. ovog zakona;
- ako ne podnese prijavu o obračunatoj i plaćenju taksi (član 16.);
- ako ne istakne firmu u skladu sa članom 4. ovog zakona.

Za prekršaj iz prethodnog stava kaznit će se odgovorno lice u pravnom licu novčanom kaznom u iznosu od 200 KM do 2.000 KM.

Član 25.

Novčanom kaznom u iznosu od 200 KM do 3.000 KM kaznit će se za prekršaj fizičko lice:

- ako ne podnese prijavu ili ako da netačne podatke za razrez takse (član 12.);
- ako ne podnese prijavu u roku iz člana 13. ovog zakona;
- ako ne prijavi Poreznoj upravi dan početka i dan završetka organizovanja žive muzike (član 14.);
- ako ne plati taksu u skladu sa članom 15. ovog zakona;
- ako ne podnese prijavu o obračunatoj i plaćenju taksi (član 16.);
- ako ne istakne firmu u skladu sa članom 4. ovog zakona.

IX - PRELAZNE I ZAVRŠNE ODREDBE

Član 26.

Za taksene obaveze nastale do dana stupanja na snagu ovog Zakona taksa se plaća po propisima koji su važili u trenutku nastanka taksene obaveze.